

城名非爲水目原夫致謬之由俱以汜鄭爲名故也是爲爽矣又按郭緣生述征記劉澄之永初記並言高祖即帝位於是水陽今不復知舊壇所在盧諶崔雲亦言是矣余按高皇帝受天命於定陶汜水又不在此也於是求壇故無髣髴矣

河水又東逕板城北

有津謂之板城渚口

河水又東逕五龍塢北

臨長河塢有五龍祠應劭云崑崙山廟在河東滎陽縣疑卽此祠所未詳

又東過滎陽縣浪蕩渠出焉

大禹塞滎澤開之以通淮泗卽經所謂浪蕩渠也

漢平帝之世河汴決壞未及得脩汴渠東侵日月

彌廣門故處皆在水中漢明帝永平十二年議治

汴渠上乃引樂浪人王景問水形便景陳利害應

對敏捷帝甚善之乃賜山海經河渠書禹貢圖及

以錢帛後作堤發卒數十萬詔景與將作謁者王

昊共防築堤脩塌起自滎陽東至千乘海口千有

餘里景乃商度地勢鑿山開澗防遏衝要踈決壅

積十里一門水更相迴注無復潰漏之患明年渠

成帝親巡行詔濱河郡國置河堤員吏如西京舊

制景由是顯名王昊諸從事者皆增秩一等順帝

陽嘉中又自汴口以東緣積石爲堰河通淮古口

咸曰金堤靈帝建寧中又增脩石門以遏淮口水

盛則通注津耗則輟流

河水又東北逕卷之扈亭北

春秋左傳曰文公七年晉趙盾與諸侯盟于扈竹
書紀年晉出公二十二年河絕於扈即於是也
河水又東逕八激堤北

漢安帝永初七年令謁者大山于岑於石門東積
石八所皆如小山以捍衝波謂之八激堤

河水又東逕卷縣北

晉楚之戰晉軍爭濟舟中之指可掬楚莊祀河告
成而還即是處也

河水又東北逕赤岸固北而東北注之又東北過武
德縣東沁水從之

河水自武德縣漢獻帝延康元年封曹獻為國即
魏明帝也

東至酸棗縣西濮水東出焉

漢興三十有九年孝文時河決酸棗東潰金堤大
發卒塞之故班固云文堙棗野武作瓠歌謂斷此
口也今無水

河水又東北通謂之延津

石勒之襲劉耀途出於此以河水泮為神靈之助
號是處為靈昌津昔澹臺子羽齎千金之璧渡河
陽侯波起兩蛟挾舟子羽曰吾可以義求不可以
威却操劍斬蛟蛟死波休乃投璧於河三投而輒
躍出乃毀璧而去示無恡意趙建武中造浮橋於

津上採石爲中濟石無大小下輒流去用功百萬
經年不就石虎親閱作公沈璧于河明日璧流渚
上波蕩上岸遂斬匠而還

河水又逕東燕縣故城北則有濟水自北來注之

河水於是有棘津之名亦謂之濟津故南津也春
秋僖公二十一年晉將伐曹曹在縣東假道于衛
衛人不許還自南河即此濟也河水於是亦有棘
津之名晉伐陸渾亦於此渡宋元嘉中遣輔國將
軍蕭斌率寧朔將軍王玄謨北入宣威將軍桓護
之以水軍守石濟即此處也

河水又東淇水入焉又東逕遮害亭南

漢書溝洫志曰在淇水口東十八里有金堤堤

一丈自淇口東地稍高至遮害亭西五丈又有宿
胥口舊河水北入也

河水又右逕滑臺城

有三重中小城謂之滑臺城舊傳滑臺人自修築
此城因以名焉城即故鄭廩延邑也下有延津春
秋傳曰孔悝爲蒯瞶所逐載伯姬于平陽行于延
津是也廩延南故城即衛之平陽亭也今時人謂
此津爲延壽津宋元嘉中右軍到彥之留建威將
軍朱脩之守此城魏軍南伐脩之執節不下其母
悲憂一旦乳汁驚出母乃號踴告家人曰我年老
非有乳時今忽如此吾兒必沒矣脩之絕拔果以
其曰陷沒城故東郡治續漢書曰延熹九年濟陰

東郡濟北平原河水清襄楷上疏曰春秋注記未有河清而今有之易乾鑿度曰上天將降嘉應河水先清京房易傳曰河水清天下平天垂翼地吐妖民厲疾三者並作而有河清春秋麟不當見而見孔子書以爲異河者諸侯之相清者陽明之徵豈獨諸侯有窺京師也明年宮車晏駕徵解瀆侯爲漢嗣是爲靈帝建寧四年二月河水又清也又東北過黎陽縣南

黎侯國也詩式微黎侯寓于衛是也晉灼曰黎山在其南河水逕其東其山上碑云縣取山之名取水之陽以爲名也王莽之魏丞也今黎山之東北故城蓋黎陽縣之故城也山在城西城憑山爲基

東岨爲河故劉楨黎陽山賦曰南蔭黃河左復金城青壇承把高碑頌靈昔慕容玄明自鄴率戶南徙滑臺旣無舟楫將保黎陽昏而流澌冰合於夜中濟訖旦而冰泮燕民謂是處爲天橋津東岸有故城嶮帶長河戴延之謂之違明壘周二十里言違明石勒十八騎中城因名焉郭緣生曰城袁紹時築皆非也余案竹書紀年梁惠成王十三年鄭釐侯使許息來致地平丘戶牖首垣諸邑及鄭馳地我取枳道與鄭鹿鄭鹿即是城也今城內有故臺尚謂之鹿鳴臺又謂之鹿鳴城王玄謨自滑臺走鹿鳴者也濟取名焉故亦曰鹿鳴津又曰白馬濟津之東南有白馬城衛文公東徙渡河都之故

濟取名焉。裴紹遺顏良攻東郡太守劉延於白馬關羽爲曹公斬良以報效。即此處是也。白馬有韋鄉。韋城故津亦有韋津之稱。史記所謂脩武下武渡。韋津者也。河水舊於白馬縣南決通濮。濟黃溝。故蘇代說燕曰。決白馬之口。魏無黃濟陽竹書紀年。梁惠成王十二年。楚師山河水以水長垣之外者也。金堤旣建。故渠水斷。尚謂之白馬瀆。故瀆東逕鹿鳴城南。又東北逕白馬縣之涼城北。耆舊傳云。耆舊東郡白馬縣之神馬亭。實中層峙。南北二百步。東西五十許步。狀丘斬城也。自外耕耘墾所。削落平盡。正南有陟躔陞上方軌。是由西南側城。有神馬寺。樹木修整。西去白馬津可二十許里。東

南距白馬縣故城可五十里。疑即開山圖之所謂白馬山也。山上常有白馬羣行。悲鳴則河決。馳走則山崩。注云山在鄭故。此鄭也。所未詳。劉澄之云。有白馬塞。孟達登之。長歎可謂於川土踈矣。亭上舊曰置源城。縣治此。白馬瀆。又東南逕濮陽縣。散入濮水。所在決會。更相通。注以成往復也。

河水自津東北逕涼城縣

河北有般祠。孟氏記云。祠河中積石爲基。河水漲。盛恒與水齊。戴氏西征記曰。今見祠在東岸。臨河累石爲壁。其屋宇容身而已。殊似無靈。不如孟氏所記將恐言之過也。

河水又東北逕伍子胥廟南

祠在北岸頓丘郡界臨側長河廟前有碑魏青龍三年立

河水又東北爲長壽津

述征記曰涼城到長壽津六十里河之故瀆出焉漢書溝洫志曰河之爲中國害尤甚故導河自積石歷龍門二渠以引河一則漯川今則所流也一則北瀆王莽時空故世俗名是瀆爲王莽河也

故瀆東北逕戚城西

春秋哀公二年晉趙鞅帥師納衛太子蒯聩于戚宵迷陽虎曰右河而南必至焉今須立衛國縣西戚亭是也爲衛之河上邑漢高帝十二年封將軍李必爲侯國矣

故瀆又逕繁陽縣故城東

史記趙將廉頗伐魏取繁陽者也

北逕陰安縣故城西

漢武帝元朔五年封魏不疑爲侯國

故瀆又東北逕昌樂縣故城東

地理志東郡之屬縣也漢宣帝封王稚君爲侯國故瀆又東北逕平邑郭西

竹書紀年晉烈公四年趙城平邑五年田公子居思伐趙鄙圍平邑十年齊田汾及邯鄲韓舉戰于平邑邯鄲之帥敗遂獲韓舉取平邑新城

又東北逕元城縣故城西北而至沙丘堰

史記曰魏武侯公于元食邑於此故縣氏焉郭東

有五鹿墟墟之在左右多陷城公羊曰藁邑也說
曰襲陷矣郡國志曰五鹿故涉鹿有沙亭周穆王
喪盛姬東征舍於五鹿其女升姓屈此思哭是日
女坐之丘爲沙鹿之異名也春秋左傳僖公十四
年沙鹿崩晉史卜之曰陰爲陽雄土火相乘故有
沙鹿崩後六百四十五年宜有聖女興其齊田乎
後王翁孺自齊徙元城正直其地日月當之王氏
爲舜後土也漢火也王禁生政君其母夢見月入
懷年十八詔入太子宮生成帝爲元后漢柞道沿
四世稱制故曰火土相乘而爲雄也及崩大夫楊
雄作誄曰太陰之精沙鹿之靈作合於漢配元生
成者也獻帝建安中袁紹與曹操相禦於官渡紹

逼大司農鄭玄載病隨軍屈此而卒郡守已下受
業者衰經赴者千餘人玄注五經讖緯候歷天文
經通於世故范曄贊曰孔書遂明漢章中輒矣縣
北有沙丘塌者不遵其道曰降亦曰潰堰障水也
至于大陸北播于九河

風俗通曰河播也播爲九河自此始也禹貢沈州
九河旣道矣謂徒駭太史馬頰覆釜胡蘇簡潔勾
盤隔津也同爲逆河鄭玄曰下尾合曰逆河言相
承受矣蓋所潤下之勢以通河海及齊桓霸世塞
廣田居同爲一河故自堰以北館陶陶貝丘鬲般
廣川信都東光河間樂成以東城地並存川瀆多
亡漢世河決金堤南北離其害議者常欲求九河

故遠而川之未知其所是以班固云自茲距漢此
三八枝者也

河之故瀆自沙丘堰南分屯氏河出焉河水故瀆東
北逕發于縣北城西又屈逕其北

王莽之所謂戢盾矣漢武帝以大將軍衛青破左
賢王功封其子登為侯國

大河故瀆又東逕貝丘縣故城南

應劭曰左氏齊襄公田于貝丘是也余按京相璠
杜預並言在博昌即司馬彪郡國志所謂貝中聚
者也應注於此事近迹矣

大河故瀆又東逕甘陵縣故城南

地理志之所謂廟也王莽改曰廟治者也漢安帝

父考德皇以太子被廢為王薨於此乃葬其地尊
陵曰甘陵桓帝建和元年改曰甘陵縣亦取名焉
是周之甘泉市地也陵在瀆北丘墳高巨雖中經
發壞猶若層陵矣世謂之唐侯家城曰邑城皆非
也昔南陽文叔良以建安中為甘陵丞夜宿水側
趙人蘭襄夢求改葬叔良明循水求棺果於水側
得棺半許落水叔良顧親舊曰若聞人傳此吾必
以為不然遂為移殯馱而去之大河故瀆又東逕
艾亭城南又東北逕平晉城南金城中有浮圖五
層上有金露梓題云趙建武八年比釋道龍和上
竺浮圖澄樹德勸化與立神廟浮圖以壞露梓尚
存煒煒有光明大河故瀆又東北逕虛縣故城南

王莽之播亭也河瀆於縣別出爲鳴犢河河水故瀆又東逕郟縣故城東呂后四年以父嬰功封子侗龍爲侯國王莽更名之曰善陸

大河故瀆又東逕平原縣故城西而北絕屯氏三瀆北逕繹幕縣故城東北西流逕平原高縣故城西地理志曰鬲津也王莽名之白河平亭故有窮后國也應劭曰鬲偃姓各繇後光武建武十三年封建議將軍朱祐爲侯國

大河故瀆又北逕脩縣故城東又北逕安陵縣西本脩之安陵鄉也地理志風俗記曰脩縣東四十里有安陵縣故縣也又東北至東先縣故城西而北與漳水合一水分

大河故瀆北出爲屯氏河逕館陶縣東東北出

漢書溝洫志曰自塞宣防河復北決於館陶縣分爲屯氏河廣深與大河河等成帝之世河決館陶及東郡金堤上使河堤謁者王延世塞之二十日堤成詔以建始五年爲河平元年以延世爲光祿大夫是水亦斷屯氏故瀆水之又東北屯氏別河出焉屯氏別河故瀆又東北逕信城縣張甲出焉地理志曰張甲河及瀆北絕河於廣宗縣清分爲二瀆者也張甲河及瀆北絕河於廣宗縣清分爲二瀆左瀆逕廣宗縣故城西又北逕建始縣故城東田融云趙武帝二十二年立建興治廣宗置建始興德五縣隸焉

左瀆又北逕經城東繚城西又逕南宮縣西北注絳瀆
右瀆又東北逕廣宗縣故城南又東北逕界城亭北
又東北逕長樂郡武彊縣故城東

長樂故信都也晉太康五年改從今名

又東北逕廣川縣與水故道合又東北逕廣川縣城
西又東逕棘津亭南

徐廣曰棘津在廣川司馬彪曰縣北有棘津城呂
尚賣食之困疑在此也劉澄之云譙郡鄆縣東北
有棘津亭故邑也呂尚所困處也余案春秋左傳
伐巢克棘入州來無津字杜預春秋釋地又言棘
亭在鄆縣東北亦不云有淳字矣而竟不知澄之
於何而得是說然天下以棘爲名者多未可咸謂

之棘津也又春秋昭公十四年晉侯使荀吳帥師
涉自棘津用牲于洛遂滅陸渾杜預擇地闕而不
書服虔曰棘津猶孟津也徐廣晉紀又言石勒自
葛陂寇河北襲汲人向水於方頭濟自棘棘津在
東郡河內之間田融以爲卽石濟南津也雖千古
茫昧理世玄遠遺又逸句容或可尋公途隱顯方
士可驗司馬遷云呂望東海上人也老而無遇以
釣于周文王有呂望行年五十賣食棘津七十則
屠牛朝歌行年九十身爲帝師皇甫士安云欲隱
東海之濱聞文王善養老故入釣於周今汲水城
亦言有呂望隱居處起自東海迄于鄆雍緣其逕
趣趙魏爲密曆之譙宋事爲疏矣

張甲故瀆又東北至脩縣東會清河

十三州志曰張甲河東北至脩縣入清漳者也

屯氏別河東枝津出焉東逕信城城南又東逕青陽縣故城南清河郡北

魏自清陽徙置也

又東北逕陵鄉南又東北逕東武城縣故城南又東北逕東陽縣故城南

地理志曰王莽更之曰骨陵矣俗人謂之高黎郭非也應劭曰東武城東北三十里有陽鄉故縣也又東散絕無復津逕

屯氏別瀆又東北逕清河郡南又東北逕清河故城西

漢高六年封王某為侯國地理風俗志曰甘陵郡東南十七年有河清故城者世謂之鵠城也又東北經繹幕縣南公為一瀆

屯氏別河北瀆東逕繹幕縣故城南東邑大河故瀆又東北逕平原縣枝津北出至安陵縣遂絕屯氏別河北瀆又東北逕重平縣故城南

應劭曰重合縣西南八十里重平鄉故縣也又東北逕重合縣故城南又東北逕定縣故城南漢武帝元朔四年封齊孝王子劉成為侯國地理風俗記曰饒安縣東南三十里有定鄉城故縣也

屯氏別河北瀆又東入陽信縣今無水又東為咸河東北流逕陽信縣故城北

地理志渤海之屬縣也東注于海

屯氏別河南瀆自平原東絕大河故瀆又逕平原縣故城北東北枝津又出東北至安德縣界東會商河屯氏別河

南瀆又東北於平原界又有枝渠右出至安德縣遂絕

屯氏別河南瀆自平原城北首受大河故瀆東出亦通謂之篤馬河

即地理志所謂平原縣有篤馬河東北入行五百六十里者也

東北逕安德縣故城西又東北逕臨齊城南始東齊末賓大魏築城以臨之故城得其名也

又屈逕其城東故瀆廣四十步又東北逕重丘縣故城西

春秋襄公二十五年秋同盟重丘伐齊故也應劭曰安德縣北五十里有重丘鄉故縣也

又東北逕西平昌縣故城北

北海有平昌縣故加西漢宣帝元康元年封王長君為侯國故渠川派東入般縣為般河蓋亦九河之一道也漢書稱公孫瓚破黃巾于般河即此瀆也又東為白鹿淵水南北三百步東西千餘步深三丈餘其水冬清而夏濁渟而不流若夏水洪泛水深五丈方乃通注般瀆

又逕般縣故城北

王莽更之曰分明也

東逕樂陵縣故城北

地理志曰故都尉治伏琛晏謨言平原邑今分爲郡

又東北逕陽信縣故城南東北入海

屯氏河故瀆自別河東逕甘陵之信鄉縣故城南

地理志曰安帝更名安平應劭曰甘陵西北十七里有信鄉故縣也

屯氏故瀆又東逕甘陵縣故城北逕靈縣北又東北逕鄒縣與鳴犢河故瀆合上承大河故瀆於靈縣南地理志曰河水自靈縣別出爲鳴犢河者也

東北逕靈縣東東入鄒縣而北合屯氏瀆屯氏瀆兼

鳴犢之稱也又東逕鄒縣城北東北合大河故瀆謂之口十三州志曰鳴犢河東北至修入屯氏考瀆則不至也

又東北有過衛國縣南又東北過濮陽縣北瓠子河出焉河水東逕鐵丘南

春秋左氏傳哀公二年鄭罕達帥師郵無恤御簡子衛太子爲石登鐵丘望見鄭師衛太子自投車下卽此處也京相璠曰鐵丘名也杜預曰在戚南河之北岸有目城城戚邑也東城有子路冢河之有竿城郡國志曰衛縣有竿城者也河南有龍淵宮武帝元光中河決濮陽汜郡十六發卒十萬人故決河起龍淵宮蓋武帝起宮於決河之傍龍淵

之側故曰龍淵宮也

河水東北流而逕濮陽縣北爲濮陽津

故城在南與衛縣分水城北十里有瓠河口有金堤宣房堰粵在漢世河決金堤涿郡王遵自益州刺史遷東郡太守河水盛溢泛浸瓠子金堤決壞遵躬率民吏投沈白馬祈水神河伯親執圭璧諸身填堤廬居其上吏民皆走遵立不動而水決齊足而止公私壯其勇節

河水又東北逕衛國縣南東爲郭口津河水又東逕

城縣北

一作國口

故城在河南一十八里王莽之野良也沈州舊治魏武創業始自於此河上之邑最爲峻固晉八王

故事曰東海王越治郵城城無故自壞七十餘丈越惡之移治濮陽城南有魏使持節征西將軍太尉方城侯鄧艾廟廟南有艾碑秦建元十二年廣武將軍沈州刺史關內侯安定彭超立河之南岸有新城宋寧朔將軍王玄謨前鋒入河所築也北岸有新臺鴻基曾廣高數丈衛宣公所築新臺矣詩齊姜所賦也爲廬關津臺東有小城崎嶇頽側臺枕河俗謂之底閣城疑故關津都尉治也所未詳矣

河水又東北逕范縣之秦亭西

春秋經書築臺于秦者也

河水又東北逕委粟津

大河之北即東武陽縣也

左會浮水故瀆

故瀆上承大河於頓丘縣而北出東逕繁陽故城南故應劭曰縣在繁水之陽張晏曰縣有繁淵春秋襄公二十年經書公與晉侯齊侯盟于澶淵杜預曰在頓丘縣南今名繁汗澶淵即繁淵也亦謂之浮水焉昔魏徙大梁趙以中牟易魏故志曰趙南至浮水繁陽即是瀆也

故瀆東絕大河故瀆東逕五鹿之野

晉文公受塊於野人卽此處矣京相璠曰今衛國縣西北三十里有五鹿地今屬頓丘縣

浮水故瀆又東南逕國邑

城北故衛公國也漢光武以封周後也

又東逕衛國縣故城南古榭觀

應劭曰夏有觀扈卽此城也竹書紀年梁惠成王二年齊田壽率師伐趙圍觀觀降

浮水故瀆又東逕河牧城而東北出

郡國志曰衛國姚姓有河牧城

又東北入東武陽縣東入河又有漯水出焉

戴延之謁之武陽也地理志曰漯水出東郡武陽縣今漯水上承河水於武陽縣東南西北逕武陽新城東曹操爲東郡所治也引水自東門石竇北注于堂池池南故基尚存中城內又立一石甚大城西門名水井門內曲中水井猶存門外有故

臺號武陽臺亦有隅雉遺迹

河水又東逕武陽縣東范縣西而東北流也又東北過東阿縣北河水於范縣東北流爲倉亭津

述征記曰倉亭津在范縣界去東阿六十里魏土地記曰津在陽縣東北七十里津河濟名也河水又歷柯澤

春秋左傳襄公十四年衛孫文子敗公徒於柯澤著也

逕東阿縣故城西而東北出流注

河水枝津東出謂之鄧里渠也

又東北過荏平縣西河自鄧里渠東北逕昌鄉亭北逕碭礮城西

述征記曰碭礮津名也自黃河泛舟而渡者皆爲津也其城臨水西南崩于河宋元嘉二十七年以王玄謨爲寧朔將軍前鋒入河平碭礮守之都督劉義恭以沙城不守召玄謨今毀城而還後登城之魏立濟州治此也河水衝其西南隅又崩于河即故荏平縣也應劭曰荏山名也縣在山之平陸故曰荏平也王莽之功崇矣經曰大河在其西鄉里渠歷其東即斯邑也昔石勒之隸師懽屯耕於荏平聞鼓角鞞鐸之聲於是縣也而與柳城分河河水又與鄧里渠水上承大河於東阿縣西東逕東阿縣故城北

故衛邑也應仲瑗曰有西故稱東魏封曹雄爲侯

國大城北門內西側阜上有大井其巨若輪深六
七丈歲嘗煮膠以貢天府本草所謂阿膠也故世
俗有阿井之名縣出佳繒縑故史記云秦昭王服
大阿之劔阿縞之衣也

又東北逕縣邑與將渠合又北逕荏平縣東臨邑縣
故城西北流入於河河水又東北流四瀆津

津西側岸臨河有四瀆祠東對四瀆口河水東分
濟亦曰沛水受河也然滎口水右斷門不通始自
是出東北流逕九里與清水合放沛瀆也自河入
濟自沛入淮自淮達江水徑周通故有四瀆之名
也昔趙殺鳴犢仲尼臨河而歎自是而返曰丘之
不濟命也夫琴操以爲孔子臨狄水而歌矣狄水

衍兮風揚波船楫巔倒更相加余案臨濟故狄也
是濟所逕也得其通稱河水又逕楊墟縣也故城
東俗猶謂是城曰陽城矣河水又逕荏平城東城
內有故臺世謂之時平城非也蓋荏時音相近耳
疑縣徙也

又東北過高唐縣界

河水於縣濕水注之地理志曰濕水出東郡東武
陽縣今濕水上承河水於武陽縣東南西北逕武
陽新城東曹操爲東郡所治也引水自東門石竇
北注于堂池池南故基尚存中城內又有一石甚
大城西門名水井門內曲中水井猶存門外有故
臺號武陽堂匝臺亦有隅雉遺迹水自城東北逕

東武陽縣故城南應劭曰縣在武水之湯王莽之
武昌也然則漯水亦或武水也臧洪爲東郡太守
治此曹操圍張超於雍丘洪以情義請袁紹求之
不許洪與紹絕紹圍洪城中無食洪呼吏士曰洪
於大義不得不死諸君無事空受此禍衆泣曰何
忍捨明府也男女八千餘人相枕而死洪不屈紹
殺洪邑人陳容爲丞謂曰寧與臧洪同日死不與
將軍同日生紹又殺之士爲傷歎今城四周紹圍
郭尚存水匝隍壅於城東北合爲一瀆東北出郭
逕陽平縣之岡城西郡國志曰陽平縣有岡成亭
逕陽平縣故城東漢昭帝元平元年封丞相蔡義
爲侯國漯水又北絕莘道城之西北有莘亭春秋

桓公十年公使伋使諸齊今盜待於莘伋壽繼殞
於此亭京相璠曰今平陽陽平縣北一十里有故
莘亭道阨限蹊要自衛適齊之道也望新臺於河
上感二字於宿齡詩人乘舟誠可悲矣今縣東有
二子廟猶謂之孝祠矣漯水又東北逕樂平縣故
城東縣故清也漢高帝八年封官中同於清宣帝
封許廣少弟翁孫爲樂平並爲侯國王莽之清治矣
漢章帝建始中更從今名也濕水又北逕聊城縣
故城西城內有金城周匝有水南門有馳道絕水
南出自外泛舟而行矣東門側有層臺秀出魯仲
連所謂還高唐之兵郤聊城之衆者也
漯水又東北逕清河縣故城北

地理風俗記曰甘陵故清河清河在南一十七里今於甘陵縣故城東南無城以擬之直東二十里有艾亭城東南四十里有此城擬卽清河城也後蠻居之故世稱蠻城也

漯水又東北逕文鄉城東南又東北博平縣

故城內有層臺秀上王莽改之曰加陸也

右與黃溝同注川澤

黃溝承聊城郭水水泛則津注水耗則輟流自城東北出逕清河城南又東北逕攝城北春秋所謂聊攝以東也俗稱郭城非也城東西三里南北二里東西隅有金城城卑下墟郭尚存左右多墳隴京相璠曰聊城縣東北三十里有故攝城今此城

西去聊城二十五六里許即攝城者也

又東逕文鄉城又東南逕王城北

魏太常七年安平王鎮平原所築世謂之王城太和二十三年罷鎮立平原郡治此城也

黃溝又東北逕左與漯水隱覆勢鎮河陸東出於高唐縣大河右迤東注漯水矣

桑欽地理志曰漯水出高唐余案竹書穆天子傳稱丁卯天子自五鹿東征釣於漯水以祭淑人是日祭丘巳巳天子東征食馬於漯水之上尋其泐歷逗趣不得近出高唐也桑氏所言蓋津流出次于所間也俗以是水土承于河亦謂之源河矣

漯水又東北逕援縣故城西

王莽之東順亭也杜預釋地曰濟南祝阿縣西北有援城

漯水又逕高唐縣故城東

昔齊威王使盼子守高唐趙人不敢漁於河即魯仲連子謂由巴曰今楚軍南陽趙伐高唐者也春秋左傳哀公十年趙鞅帥師伐齊取黎及轅毀高唐之郭杜預曰轅即援也祝阿縣西北有高唐城漯水又東北逕漯陰縣故城北

縣故黎邑也漢武帝元光三年封匈奴降王莽更名翼城歷北漯陰城南伏琛謂之漯陽城南有魏沈州刺史劉岱碑地理風俗記曰平原漯陰縣今巨漯亭是也

漯水又東北逕著縣故城南又東北逕崔氏城北

春秋左傳襄公二十七年崔成請老崔氏者也杜預釋地曰濟南東朝陽縣西北有崔氏城

漯水東南逕東朝陽縣故城南

漢高帝六年封都尉宰寄爲侯國地理風俗記曰南陽有朝陽縣故加東地理志曰王莽之脩治也

漯水又東逕漢徵君伏生墓南

碑碣尚存以明經爲秦博士秦坑儒士伏生隱焉漢興教于齊魯之間文帝撰五經尚書太傅安車徵之年老不行及使掌故歐陽生等受尚書於徵君號曰伏生者也

漯水又東逕鄒平縣故城北

右鄒侯國舜後姚姓也

又東北逕界東鄒城北

地理志曰千乘郡有東鄒縣

漯水又東北逕建信縣故城北

漢高帝七年封婁敬爲侯國應劭曰臨沛縣西北五十里有建信信城都治故城者也

漯水又東北逕千乘縣二城間

漢高帝六年以爲千乘郡王莽之建信也章帝建初四年爲王國和帝永元七年改爲樂安郡故齊也伏琛曰千乘城齊城西北一百五十里隔會水卽漯水之別名也

又東北爲馬常坑

坑東西八十里南北三十里亂河枝流而入于海河海之饒茲焉爲最地理風俗記曰漯水東北至千乘入海河盛則通津委海水耗則微涓絕流書浮于濟漯亦是水者也

又東北過楊墟縣東商河出焉

地理志曰楊虛平原之隸縣也漢景帝四年以封齊悼惠王子將廬爲侯國也城在高唐城之西南經次於此是不比也商河受首河亦漯水及澤水所潭水也淵而不流世謂之清水自此雖沙漲填塞厥迹尚存歷澤而北俗謂之落里坑逕張公城西又北重源潛發世謂之落里坑亦曰小漳河商漳聲相近故字與讀移耳

商河又北逕平原縣東又逕安德縣故城南又東北逕昌平縣故城南又東逕般縣故城南又東逕樂陵縣故城南

漢宣帝地節四年封侍中史子長爲侯國

商河又東逕初鄉縣故城南

高后八年封齊悼惠王子劉辟光爲侯國也王莽更之曰張鄉也應劭曰般縣東南六十里有初鄉城故縣也

沙溝水注之

水南出大河之陽泉源之不合河者二百步其水北流注商河

商河又東北流逕馬嶺城西北而流屈而東注南轉

逕城東

城在河曲之中東海王越斬汲桑於是城

商河又東北逕富平縣故城北

地理志曰侯國也王莽曰安樂亭應劭曰明帝更名闕駟曰厭次縣本富平矣車騎將軍張安世之封邑非也按漢書昭帝元鳳六年封右將軍張安世爲富平侯薨子延壽嗣國在陳留別邑魏郡陳留風俗傳曰陳留尉氏縣安陵鄉故富平縣也是乃安世所食矣歲入租千餘萬延壽自以身無功德何堪久居先人大國上書減戶天子以爲有讓徒封平原并食一邑戶口和故而稅減半十三州志曰明帝永平五年改曰厭次矣按史記高祖功

臣侯者年表高帝六年封元項爲侯國徐廣音義曰漢書作侯爰類字是知厭次舊名非始明帝蓋復故耳縣西有東方朔冢側有祠祠神驗水側有雲城漢武帝元封四年封齊孝王子劉信爲侯國也

商河又分爲二水南水謂之長聚溝

東流傾注爲海溝南海側有蒲臺臺高八丈方二百步三齊略記曰鬲城東南有蒲臺秦始皇東遊海上於臺下蟠蒲繫馬至今歲蒲生縈委若有繫狀似水楊可以爲箭今東去海三十里

北水世又謂之白薄瀆東北流注于海水矣

大河又東北逕高唐縣故城西

春秋左傳襄公十九年齊靈公廢太子光而立公子牙以風沙衛爲少傅齊侯卒崔杼逆光光立殺公子牙於句瀆之丘衛奔高唐以叛京相璠曰本平原縣也爲之西鄙也大河逕其西而不出其東經言出東誤耳

大河又北逕張公城臨側河湄

魏青州刺史張治北故世謂之張公城水有津焉名之曰張公渡

河水又北逕平原縣故城東

地理風俗記曰原博平也故曰平原矣縣故平原郡治矣漢高帝六年置王莽改曰河平也晉灼曰

齊西有平原河河水北過高唐縣卽平原也故經言河水逕高唐縣東非也案地理志曰高唐平原也高唐濕水所出平原則篤馬河導焉明平原非高唐大河不得出其東審矣大河右溢世謂之甘棗溝

水側多棗故俗取名馬河盛則委泛水耗則輟流故瀆又東北歷長堤逕温陰縣北

東逕著城北東爲陂淀淵潭相接世謂之穢野薄河水又東北逕陽阿縣故城西

漢高帝六年封郎中萬訢爲侯國應劭曰温陰縣東南五十里有陽阿鄉故縣也

又東北過漯陽縣北河水自平原左逕安德城東而

北爲鹿角津東北逕般縣樂陵初鄉厭次縣故南厭次河

漢安帝永初二年劇縣畢毫等數百乘船寇平原縣令劉雄門下小吏所輔浮舟追至厭次津與賊合戰並爲賊擒求代雄毫縱雄於此津所輔可謂孝盡愛敬義極君臣矣

河水又逕漯陰縣故城北一作右逕

王莽之臣武縣也

河水又東北爲漯沃津

漯沃縣故城南王莽之近亭者也地理風俗記曰千乘縣西北五十里有大河河北有漯沃城故縣也魏改爲後部亭今俗遂名之曰右輔城

河水又東逕千乘城北

伏琛之所謂千乘北城者也

又東北過黎城縣北又東北過甲下邑濟水從西來注之又東北入于海

河水又東分爲二水枝津東逕甲下城南東南歷常沈注濟

經言沛水注河水自枝津東北流逕甲下邑北世謂之倉子城非也又東北流入于海淮南子曰九折注爲海而流不絕者崑崙之輸也尚書禹貢曰夾石碣石入于河山海經曰碣石之山繩水出焉東流注于河河之入海舊在碣石今川流所導非禹瀆也周定王五年河徙故瀆故班固曰商湯周

移也又以漢武帝元光二年河又徙東郡更注渤海是以漢司空掾王瓚言曰往昔天嘗連北風海水溢西南出侵數百里故張君云碣石在海中蓋淪於海水也昔燕齊遼曠分置營州今城屆海濱海水北侵城垂淪平王瓚之言信而有徵碣石入海非無證

水經卷第五

水經
卷之六

汾
洞過

滄
晉

涑
湛

文
濟

原公

臺灣國家圖書館, NATIONAL CENTRAL LIBRARY, TAIWAN, R.O.C.

水經卷第六

漢桑欽撰

後魏酈道元注

汾水

澮水

涑水

文水

原公水

洞過水

晉水

湛水

汾水出太原汾陽縣北管涔山

山海經曰北次二經之首在河之東其東首枕汾其名曰管涔之山其上無草木而下多玉汾水出焉而流注于河十三州志曰出武州之燕京山亦管涔之異名也其山重阜脩層有草無木泉源道於南麓之下蓋稚水濛流耳又西南夾岸連山聯峯接勢劉淵族子曜嘗隱居於管涔之山夜中忽有二童子入跪曰管涔王使小臣奉謁趙皇帝獻

劔一口置前再拜而去以燭視之劔長二尺光澤非常背有銘曰神劔服御除衆毒曜遂服之劔隨時變爲五色也後曜遂爲胡王矣汾水又南與東西溫溪合水出右近溪聲流翼注水上雜樹交陰雲垂煙接自是水流潭漲波襄轉泛又南逕一城東憑墉積石側枕汾水俗謂之代城城又南出二城間其城角倚翼枕汾流世謂之侯莫于城蓋語出戎方傳呼失實也汾水又南逕汾陽縣故城東川土寬平垣山夷水故地理志汾水出汾陽縣北山西南流者也漢高帝十一年封靳強爲侯國後立屯農積粟在斯謂之羊腸倉山有羊腸坂在晉陽西北石磴縈委若羊腸焉故倉坂取名矣漢永

平中治呼池石曰河按司馬彪後漢郡國志常山南行唐縣有石曰谷蓋咨乘呼池之水轉山東之費自都盧至羊腸倉將憑汾水以漕太原用實秦晉若役連年轉運所經凡三百八十九隘死者無筭拜鄧訓爲謁者監護水功訓隱括知其難立具言肅宗肅宗從之全活數千人和熹鄧后之立叔父以爲訓積善所致也羊腸卽此倉也魏土地記曰秀容胡人徙居之立秀容護軍治東去汾水六十里南與酸水合水源西出少陽之山東南流注於汾水汾水又南出山東南流洛陰水注之水出新與郡西流逕洛陰城北又西逕孟縣故城南春秋左傳僖公二十八年分祈祈七縣爲大夫之邑

以孟丙爲孟大夫水又西逕狼孟縣故城南王莽之狼調也左右夾澗幽深南面大壑俗謂之狼馬澗舊斷澗爲城又南北門門闔故壁尚在洛陰水又西南逕陽曲城北魏土地記曰陽曲胡寄居太原界置陽曲護軍治其水西南流注于汾水汾水又南逕陽曲城西南注也

東南過晉陽縣東晉水從縣南東流注之

太原郡治晉陽城秦昭襄王三年立尚書所謂旣脩太原者也春秋說題辭曰高平曰太原原端也平而有度廣延曰大鹵太原也釋名曰地不生物曰鹵盧穀梁傳曰中國曰太原夷狄曰大鹵尚書大傳曰東原底平大而高平者謂之太原郡取稱

焉魏土地記曰城東有汾水南流水東有晉使持節都督并州諸軍事鎮北將軍太原成王之碑水上舊有梁清并殞於梁下豫讓死於津側亦襄子解衣之所在也汾水西逕晉陽城南舊有介子推祠前有碑廟宇傾頽唯單碑獨存矣今文字剥落無可尋也

又南洞過水從東來注之

汾水又南逕梗楊縣故城東故榆次之梗陽縣也魏獻子以邑大夫魏戊也京相璠曰梗陽晉邑也今太原晉陽縣南四十里榆次界有梗陽地汾水又南即洞過水會者也

又南過大陵縣東

昔趙武靈王遊大陵夢處女鼓琴而歌想見其人
吳廣進孟姚焉即於此縣也王莽改曰大寧矣汾
水於縣左迤爲鄔澤廣雅曰水自汾出爲汾陂其
陂東西四里南北一十餘里陂南接鄔地理志曰
九澤在北并州藪也呂氏春秋謂之大理又名之
曰溫洩之澤俗謂之鄔城許慎說文曰馮水出西
河中陽縣之西南入河即此水也馮水又會嬰侯
之水山海經稱謁戾之山嬰侯之水出于其陰北
流注于祀水右出祀山其水殊源共合注于嬰侯
之水亂流逕中都縣南俗又謂之中都水侯甲水
注之水發源縣胡甲山有長坂謂之胡甲嶺即劉
歆遂初賦所謂越侯甲而長驅者也蔡邕曰侯甲

亦邑名也在祁縣侯甲水又西北歷宜歲郊逕太
谷謂之太谷水出谷西北流逕祁縣故城南自縣
連延西接鄔澤是爲祁藪也即爾雅所謂昭餘祈
矣賈辛邑也辛貌醜妻不爲言與之如臯射雉雙
中之則笑也王莽之爾縣也又西逕京陵縣故城
北王莽更名曰致城矣於春秋爲九原之地也故
國語曰趙文子與叔向遊於九原曰死者若可作
也吾誰與歸叔向曰其陽子乎文子曰夫陽子行
廉直於晉國不免其身智不足稱吾其隨會乎納
諫不忘其師矣故其京尚存漢興增陵於其下故
曰京陵焉甲水又西北逕中都縣故城南臨城際
水湄春秋昭公二年晉侯執陳無宇於中都者也

漢文帝爲代王都此武帝元封四年上幸中都宮
殿上見光赦中都死罪以下甲水又西合爲嬰侯
之水逕鄔縣故城南晉大夫司馬稱牟之邑也謂
之鄔水也俗亦曰慮水慮馮聲相近故因變焉又
西北入鄔陂而歸于汾流矣

又南過平陶縣東文水從西來流注

汾水又南與石桐水合即線水也水出界休縣之
綿山北流逕石桐寺西即介子推之祀也昔子推
逃晉文公之賞而隱於綿上之山也晉文公求之
不得乃封綿爲介子推田曰以志吾過且旌善人
因名斯山爲介山故袁崧郡國志曰界休縣有介
山綿上聚子推廟王肅襄服要記曰昔魯哀公祖

載其父孔子問曰寧設桂樹乎哀公曰不也桂樹
者起於介子推子推晉之人也文公有內難出國
之狄子推隨其行割肉以饋軍糧後文公復國忽
忘子推子推奉唱而歌文公始悟當受爵祿子推
抱木而燒死國人葬之恐其神魂賈於地
故作桂樹焉吾父生於宮殿死於枕席何用桂樹
爲余案夫子尚非輿播送葬安能問桂樹爲禮乎
王肅此證近於誣矣石桐水又西流注于汾水又
西南逕介休縣故城西王莽更名之曰分美矣城
東有徵士郭林宗宋子浚二碑宋沖以有道司徒
徵林宗縣也辟司徒舉太尉以疾辭其碑文之云
將蹈洪崖之遐迹紹巢由之逸軌翔區外以舒翼

起天路以高峙稟命不融享年四十有三建寧四年正月丁亥卒凡我四方同好之人永懷哀痛乃樹碑表墓昭銘景行云陳留蔡伯喈范陽盧子幹扶風馬日磾等遠來奔喪朋友服心喪暮年者如韓子助宋子浚等二十四人其餘門人著錫衰者千數其碑文故蔡伯喈謂盧子幹馬日磾曰吾為天下碑文多矣皆有慙容唯郭有道無愧於色矣汾水之石有左部城側臨汾水蓋劉淵為晉都尉所築也

又南過寇爵津

一作寇

汾津名也在介休縣之西南俗謂之雀鼠谷數十里間道隘水左右悉結偏梁閣道累石就路繫帶

巖側或去一丈或高六丈上戴山阜下臨絕澗俗謂之為暮般橋蓋通古之津隘又亦在今之地嶮也

又南入河東界又南過永安縣西

故彘縣也周厲王流于彘即此城也王莽更名黃城漢順帝陽嘉三年改曰永安縣霍伯之都也歷唐城東瓚注漢書云堯所都也東去彘十里汾水又東與彘水合水出東北太岳山禹貢所謂岳陽也即霍太山矣山上有飛廉以善走事紂惡來多力見知周王伐紂兼殺惡來飛廉先為紂使北方還無所報乃壇於霍太山而致命焉得石棺銘曰帝令處父不與殷亂賜汝石棺以葬死遂以葬於

霍太山有岳廟甚靈鳥雀不棲其林猛虎常守其庭又有靈泉以供祭事鼓動則泉流聲絕則水竭湘東陰山縣有侯曇山有上靈壇壇前有石井深數尺居常無水及臨祈禱則甘泉湧出周用則已亦其比也彘水又西流逕觀阜北故有邑也原過之從襄子也受竹書於王澤以告襄子襄子齋三日親自剖竹有朱書曰余霍太山山陽侯天史也三月丙戌余將使汝反滅智氏女亦立我於百邑也襄子拜受三神之命遂滅智氏祠三神於百邑使原過主之世謂其處爲觀阜也彘水又西流逕永安縣故城南西南流注于汾水汾水又南逕霍城東故霍國也昔晉獻公滅霍趙夙爲御霍求

公奔齊晉國大旱卜之曰霍太山爲祟使趙夙召霍君奉祀晉復穰也蓋霍求公之故居也汾水又逕趙城西南穆王以封造父趙氏自此始也汾水又南霍水入焉水出霍太山發源成潭漲七十步而不測其深西南逕趙城南西流注于汾水又南過楊縣東

間水東出穀遠縣西山西南逕楊縣霍山南又西逕故城北晉大夫僚公去安之邑也應劭曰故楊侯國王莽更名有年亭也其水西流入于汾水汾水逕楊城西不於東矣魏土地記曰平楊郡治楊縣郡西有汾水南流者是也

西南過高粱邑西

黑水出黑山西逕楊城南又西與巢山水會山海經曰牛首之山勞水出焉西流注于滴水疑是水也滴水即巢山之水也水源東南出巢山東谷北逕浮山東又西北流與勞水合亂流西北逕高粱城北西流入于汾水又南逕高粱故城西故高粱之墟也春秋僖公二十四年秦穆公納公子重耳於晉害懷公於此竹書紀年晉出公三十年智伯瑤城高粱漢高帝十二年以爲侯國封恭侯酈介於斯邑也

又南過平陽縣東

汾水又南逕白馬城西魏刑白馬而築之故世謂之白馬城今平陽郡治汾水又南逕平陽縣故城

東晉大夫趙鼂之故邑也應劭曰縣在平河之陽堯舜並都之也竹書紀年晉烈公元年韓武子都平陽漢昭帝封度遼將軍范明友爲侯國王莽之香平也晉立平陽郡治此矣水側有堯廟前有碑魏土地記曰平陽城東十里汾水東原上有小臺臺上有堯神屋石碑永嘉三年劉淵徙平陽於汾水得白玉印方四寸高二寸二分龍紐其文曰有新寶之印王莽所造也淵以爲天授改永鳳二年爲河瑞元年汾水南與平陽合水出平陽西壺口山尚書所謂壺口治梁及岐也其水東逕狐谷亭北春秋時狄侵晉取狐厨者也又東逕平陽城南東入汾俗以爲晉水非也汾水又南歷襄陵縣故

城西晉大夫邾犖之邑也故其地有犖氏鄉亭矣
縣蓋即陵以名氏也王莽更名曰幹昌也

又南過臨汾縣東

天井水出東陘山西南北有長嶺嶺上東西有通
道即鉞蹬也穆天子傳曰乙酉天子西絕鉞蹬西
南至鹽是其水三泉奇發西北流摠成一川西逕
堯城南又西流入汾

又屈從縣南西流

汾水又經絳縣故城北竹書紀年梁武王二十五
年絳中地坼西絕於汾汾水西逕虎祁宮北橫水
有故梁截汾水中凡有三十柱柱徑五尺裁與水
平蓋晉平公之故梁也物在水故能持久而不敗

也又西逕魏正平郡南故東州治大和中皇都徙
洛罷州立郡矣又西逕正橋澮水入焉

又西過長修縣南

汾水又西與古水合出臨汾縣故城西黃阜下其
大若輪西南流故橫溝出焉東注于汾今無水又
西南逕魏正平郡北又西逕荀城東古荀國也汲
郡古文晉武公滅荀以賜大夫原氏也古水又西
南入于汾汾水又西南逕長修縣故城南漢高帝
十一年以爲侯國封莊恬也有修水出縣南而西
南流入汾汾水又西逕清原城北故清陽亭也城
北有清原晉侯蒐清原作三軍處也汾水又逕冀
亭南昔曰季使過冀野見郤缺釋其妻饁之相敬

如賓言之文公文公命之爲卿復與之冀京相璠
曰今河東皮氏縣有冀亭古之冀國所都也杜預
釋地曰平陽皮氏縣東北有冀亭即此亭也汾水
又西與華水合水出北山華谷西南流逕一故城
西俗謂之梗楊城非也梗楊在榆次在此非案故
漢上谷長史侯相碑云侯氏出自倉頡之後踰殷
歷周各以氏分或著楚魏或顯齊秦晉卿士爲斯
其裔也食于華陽今蒲坂北亭也既是城也其水
西南流注于汾汾水又逕稷山北在水南四十許
里山東西二十里南北三十里高十三里西去介
山一十五里山上有稷祠山下稷亭春秋宣公十
五年秦桓公治兵于稷以略狄土是也

又西過皮氏縣南

汾水西逕鄧丘北故漢氏之方澤也賈逵云漢法
三年祭地汾陰方澤澤中有方丘故謂之方澤丘
即鄧丘也許慎說文稱從邑發聲河東臨汾地名
矣在介山北山即汾山也其山特立周七十里高
三十里穎言在皮氏縣東南則可三十里乃非也
今準此山可高十餘里山上有神廟廟側有靈泉
祈祭之日周而不耗世亦謂之子推祠楊雄河東
賦曰靈輿安步周流容與以覽于介山嗟文公而
愍推兮勤大禹於龍門晉太康記及地道記與永
初記並言子推所逃隱於是山即實非也余按介
推所隱者綿山也文公環而封之爲介推田號其

山爲介山杜預曰在西河介休縣者是也汾水又西逕耿鄉城北故殷都也帝祖乙自相徙此爲河所毀故書叙曰祖乙圯于耿杜預曰平陽皮氏縣東南耿鄉是也盤庚以耿在河北迫近山川乃自耿遷亳後晉獻公滅之以封趙夙後襄子與韓魏分晉韓康子居平陽魏桓子都安邑號爲三晉此其一也漢武帝行幸河東濟汾河作秋風辭於斯水之上汾水又西逕皮氏縣南竹書紀年魏襄王十二年秦公孫爰率師伐我國皮氏翟章率師救皮氏圍疾西風十三年城皮氏者也漢河東太守番係穿渠引汾水以溉皮氏縣故渠尚存今無水又西至汾陰縣北西注于河

水南有長阜背汾帶河阜長四五里度二里餘高十丈汾水歷其陰西入河漢書謂之汾陰睢應劭曰睢丘類也汾陰男子公孫祥望氣寶物之精上見詳言之於武帝武帝於水獲寶鼎焉遷於甘泉宮改其年曰元鼎即此處

澮水出河東絳縣東澮交東高山

澮水東出詳高山亦曰河南山又曰澮山西逕翼城南按詩譜言晉穆侯遷都于絳冀孫孝侯改絳爲翼翼爲晉之舊都也後獻公又北廣其城方二里又命之爲絳故司馬遷史記年表稱獻公九年始成絳都左傳莊公二十六年晉士爲城絳以深其宮是也其水又西南合黑水嶺水導源東北黑

下谷西南流逕翼城北右引北川水出平川南流注之亂流西南入澮水澮水又西南與諸水合謂之澮交竹書紀年曰莊伯十二年翼侯焚曲沃之禾而還作爲文公也又有賀水東出近川西南至澮交入澮又有高泉水出東南近川西北趣澮交注澮又南紫谷水東出白馬山白馬川遁甲關山圖曰絳山東距白馬山謂是山也西逕榮庭城南而西出紫谷與乾河合即教水之枝川也史記曰起傳稱起涉河取韓安邑東至乾河是也其水西與田川水合水出東溪西北至澮交入澮又有女家水出于家谷竹書紀年曰莊伯以曲沃叛伐翼公子萬救翼若叔軫追之至于家谷有范壁水出

於壁下並西北流至翼廣城昔晉軍北入翼廣以築之因即其姓以名之二水合而爲西北流至澮交入澮澮水又西南與絳水合俗謂之白水也非也水出絳山東至寒泉奮湧楊波北注縣流奔壑十一許丈青崖若點黛素湍如委練望之極爲奇觀矣其水西北注流于澮應劭曰絳水出絳縣西南蓋以故絳爲言也史記稱智伯率韓魏引水灌晉陽不沒者三板智氏曰吾始不知水可以亡人國今乃知之汾水可以浸平陽絳水可以浸安邑時韓居平陽魏居安邑魏桓子肘韓康子韓康子履魏桓子肘足接於車上而智氏以亡魯定公問一言可以喪邦有諸孔子以爲幾乎余覩智氏之

談矣汾水灌平陽或亦有之絳水澆安邑未識所
由也

西過其縣南

春秋成公元年晉悼公謀去故絳欲居郇瑕魏獻
子曰土薄水淺不如新田有汾澮以流其惡遂居
新田又謂之絳即絳陽也蓋在絳澮之陽漢高帝
六年對越騎將軍華無害爲侯國縣南對絳山面
背二水古文瓚語曰晉平公與齊景公乘至于澮
上見乘白驂八駟以來有大狸身而狐尾隨平公
之車公問師曠對首陽之神有大狸身狐尾其名
曰者飲酒得福則徼之蓋於是水之上也

又西南過虓祁宮南

宮在新田絳縣故城西四十里晉平公之所構也
時有石言於魏榆晉侯以問師曠曠曰石不能言
或憑焉臣聞之作事不時怨讎動于民則有非言
之物言也今宮室崇侈民力彫盡石言不亦宜乎
叔向以爲子野之言君子矣其宮也背汾面澮西
則兩川之交會也竹書紀年曰晉出公五年澮絕
于梁即是水也

又西至王橋注于汾水

晉智伯瑤攻趙襄子襄子奔保晉陽原過後至遇
三人於此澤自帶以下不見持竹二節與原過曰
爲我遺無卹原過受之於是澤所謂王澤也

涑水出河東聞喜縣東山黍葭谷

涑水所出俗謂之華谷至周陽與洮水合水源東
出清野山世人以爲清襄山也其水東大嶺下西
流出謂之哈口又西合涑水鄭使子產問晉平公
疾平公曰卜云臺台爲祟史官莫知敢問子產曰
高辛氏有二子長曰閼伯季曰實沈不能相容帝
遷閼伯于商丘遷實沈于大夏臺台實沈之後能
業其官帝用嘉之國汾川由是觀之臺台汾洮之
神也賈逵曰汾洮二水名司馬彪曰洮水出聞喜
縣故王莽以縣爲洮亭也然則涑水殆亦洮水之
兼稱乎

又西過周陽邑南

其城南臨涑水北倚山原竹書紀年晉獻公二十

五年正月翟人伐晉周有白菟舞于市即是邑也
漢景帝以封田勝爲侯國也涑水西逕董澤陂南
即古池東西四里南北三里春秋文公六年蒐于
董澤即斯澤也涑水又與景水合水出景山北谷
山海經曰景山南望鹽販之澤北望少澤其草多
藟與秦椒其陰多赭其陽多玉郭景純曰鹽販之
澤即解縣鹽池也按經不言有水今有水焉西北
流注于涑水也

又西過其縣南

涑水又西逕仲邨邨北又西逕桐鄉城北竹書紀
年曰翼侯伐曲沃水捷武公請城于翼至洞庭乃
返者也漢書曰漢武帝元鼎六年將幸緱氏至左

邑桐鄉聞南越破以爲聞喜縣者也涑水又西與沙渠水合水出東南近川西北流注于涑水涑水又西南逕左邑縣故南城故曲沃也晉武公自晉陽徙自秦改爲左邑縣詩所謂從子于鵠者也春秋傳曰下國有宗廟謂之國在絳曰下國矣即新城也王莽之洮亭也涑水自城西注水流急濬輕津無緩故詩人以爲激揚之水言不能流移東薪耳水側即狐突遇申生處也春秋傳曰秋狐突適下國遇太子太子登僕使曰夷吾無禮吾請帝以畀秦對曰神不歆非類君其圖之君曰諾請七日見我於新城西偏及期而往見於此處故傳曰鬼神所憑有時而信矣涑水又西逕王官城北在南

原上春秋左傳成公十三年四月晉侯使呂相絕秦曰康猶不悛入我囑曲伐我涑川俘我王官故有河曲之戰是矣今世人猶謂其城曰王城也又西南過安邑縣西

安邑禹都也禹娶塗山氏女思戀本國築臺以望之今城南門臺基猶存余案禮天子諸侯臺門隅阿相降而已未必一如書傳也故晉邑矣春秋時魏降自魏徙此昔文侯縣師經之琴於其門以爲言戒也武侯二年又城安邑蓋增廣之秦始皇使左更白起取安邑置河東郡王莽更名洮陽縣曰河東也有項寧都學道昇仙忽復還此河東號曰斥仙漢世又有閔仲叔隱遁市邑罕有知者後以

識瞻而去涑水又西南逕監鹽縣故城城南有鹽池水承鹽水出東南薄山西北流逕巫咸山北地理志曰山在安邑縣東南水西經曰巫咸在女丑北右手操青蛇左手操赤蛇在登葆山羣巫所從上下也大荒西經云大荒之中有靈山巫咸即巫盼巫彭巫姑巫貞巫孔巫抵巫謝巫羅十巫從此升降百藥爰在郭景純曰言羣巫上下靈山採藥往來也蓋神巫所遊故山得其名矣谷口嶺上有巫咸桐其水又逕安邑故城南又西流注于鹽池地里志曰鹽池在安邑西南許慎謂之鹽監長五十一里廣六里周一百一十四里從鹽古聲呂宿曰沈沙煮海謂之鹽河東鹽池謂之解鹽今池水

東西七十里南北十七里紫色澄渟渾而不流水出石鹽自然印成朝取夕復終無減損唯山暴雨澍甘潦奔迭則鹽池用耗故公私共渴水徑防其淫濫故謂之鹽水亦爲竭水也故山海經謂之鹽販之澤也澤南面層山天巖雲秀池谷泉深左右壁立間不容軌謂之石門路出其中名之曰徑南通上陽北墜鹽澤池西又有一池謂之女鹽澤東西二十五里南北二十里在猗氏故城南春秋成公六年晉謀去故絳大夫曰郇瑕地沃饒近鹽服虔曰土平有漑曰沃鹽鹽也土人鄉俗引水裂沃麻分灌川野畦水耗竭土自成鹽卽所謂鹽鹺也而味苦號曰鹽田鹽監之名始資是矣本司鹽都

尉治領兵一千餘人以之周穆王漢章帝並幸安邑而觀鹽池故杜預曰猗氏有鹽池後罷尉司分猗氏安邑置縣以守之

又南過解縣東又西南注于張陽池

涑水又西逕猗氏縣故城北春秋文公七年晉敗秦于令狐至于剗首先襄奔秦士會從之闞駟曰令狐卽猗氏也剗首在西三十里縣南對澤卽猗頓之故居也孔叢曰猗頓魯之窮士也耕則常飢桑則常寒聞朱公富往而問術焉朱公告之曰子欲速富當畜五特於是乃適西河大畜牛羊于猗氏之南十年之間其息不可計貲擬王公馳名天下以興富於猗氏故曰猗頓也涑水又西逕郇城

詩云郇伯勞之蓋其故國也杜元凱春秋釋地云今解縣西北有郇城服虔曰郇國在解縣東郇瑕氏之墟也余按竹書紀年云晉惠公十有五年秦穆公率師送公子重耳圍令狐桑泉曰衰皆降爲秦師狐毛與先軫禦秦至于廬柳乃謂秦穆公使公子絳來與師言退舍次于郇盟于軍京相璠曰春秋土地名桑泉曰衰並在解東南不言解明不至解可知春秋之文與竹書不殊今解故城東北二十四里有故城在猗氏故城西北鄉俗名之爲郇城考服虔之說又與俗符賢於杜氏單又孤證夫涑水又西南逕解縣故城南春秋晉惠公因秦返國許秦以河外王城內及解梁卽斯城也涑川

又西南逕瑕城晉大夫詹嘉之故邑也春秋僖公三十年秦晉圍鄭鄭伯使燭之武謂秦公曰晉許君焦瑕朝濟而夕設版者也京相璠曰今河東解縣西南五里有故瑕城涑川又西南逕張陽城東竹書紀年齊師逐鄭太子齒奔城張陽南鄭者也漢書之所謂東張矣高祖二年曹叅假左丞相別與韓信東攻魏將孫林邀軍東張大破之蘇林曰屬東卽斯城也涑水又西南屬于陂陂分爲二城南面兩陂左右澤渚東陂世謂之晉興澤東西二十五里南北八里南對鹽道山其西則石壁千尋東則礪溪萬仞方嶺雲迴奇峯霞舉孤標秀出罩絡羣山之表翠栢蔭峯清泉灌頂郭景純云世所

謂鴛漿也發于上而潛於下矣厥頂方平有良藥神農本草曰地有固活女踈銅芸紫苑之族也是以緇服思玄之士鹿裘念一之夫代往遊焉路出北巘勢多懸絕來去者咸援蘿騰崖尋葛降深於東則連木乃陟百梯方降巖側縻鎖之跡仍今存焉故亦曰百梯山也水泉山北流五里而伏云潛通澤渚所未詳也西陂卽張澤也西北去蒲坂一十五里東西二十里南北四五里冬夏積水亦時有盈耗也

文水出大陵縣西山文谷東到其縣屈南到平陶縣東北東入于汾

文水逕大陵縣故城西而南流有沁水注之縣西

南山下武氏穿井給養井至幽深後一朝水溢平
流東南注文水又南逕平陶縣之故城東西逕其
城內南流出郭王莽更曰多穰也文水又南逕縣
右會隱泉口水謁泉山之上頂俗云暘雨愆時是
謁是禱故山得其名非所詳也其山石岸地嶮壁
立天固崖平有一石室去地可五十餘丈爰有層
松飾巖列栢綺望唯西側一處得歷級升陟頂上
平地一十許頃沙門釋僧光表建二刹泉發於兩
寺之間東流瀝石公注山下又東津渠隱沒而不
恒流故有隱泉之名矣雨澤豐澍則通入文水又
南逕茲氏縣故城東爲文湖東西一十五里南北
三十里世謂之西河在縣直東一十里湖之西側

臨湖又有一城謂之猪城水澤所聚謂之都亦曰
猪蓋卽水以名城也文湖又東逕中陽縣故城東
案晉書地道記太康地記西河中有陽縣舊縣也
文水又東南流與勝水合水出西狐岐之山東逕
六壁城南魏朝舊置六壁於其下防離石諸胡因
爲大鎮太和中罷鎮仍置西河郡焉勝水又東合
陽泉水出西山陽溪東逕六壁城北又東南流注
于勝水勝水又東逕中陽故城南又東合文水文
水又東南入于汾水也

原公水出茲氏縣西羊頭山東過其縣北

縣故秦置也漢高帝更封沂陽侯嬰爲侯國王莽
之茲同也魏黃初二年西河恭王司馬子盛廟碑

文云西河舊處山林漢末擾攘百姓失所魏興英
開疆宇分割太原四縣以爲邦邑其郡帶山側塞
矣王以咸寧四年改命爵土其年十二月喪國臣
太農閻崇離石令宗羣等二百三十四人刊石立
碑以述勲德碑北廟基尚存也

又東入于汾

水注文湖不至汾也

洞庭水出沾縣北山

其水西流與南溪水合水出南山西北流注洞過
水又西北黑水西出山三合源舍同歸一川東流
南屈受陽縣故城東按晉太康地記樂平郡有受
陽縣盧諶征歎賦所謂歷受陽而總轡者也其水

西南入洞渦水又西蒲水南出蒲谷北流注之于
洞渦又西與原過水合近北便水流也水西阜上
有原過祠蓋懷道協靈受書天使憂結宿情傳芳
後日棟宇雖淪攢木猶茂故層巒水取名焉其水
南流注于洞渦水也

西過榆次縣南又西到晉陽縣南

榆次縣故塗水鄉晉大夫智徐吾之邑也春秋昭
公八年晉侯築虎祁之宮有石言晉之魏榆服虔
曰魏晉也榆州里名也漢書曰榆次十三州志以
爲塗陽縣矣王莽之太原亭也縣南側水有鑿臺
韓魏殺智伯瑤於其下剝腹絕腸折頭揩頤處也
其水又西南流逕武觀城西北盧諶征歎賦曰逕

武館之故郭閭厥墮之遠近洞渦水又西南爲津湖謂之洞渦津澤而涂水注之水出陽邑東北大嶧山涂谷西南逕蘿磬亭南與蔣谷水合水出縣東南蔣溪魏土地記曰晉陽城東南一百一十里至山有蔣谷大道度軒車嶺通于武鄉水自蔣溪西北流西逕箕城北春秋僖公三十三年晉人敗狄于箕杜預釋地曰城在陽邑南水北卽陽邑縣故城也竹書紀年曰梁惠成王九年與邯戰榆次陽邑者也王莽之繁穰矣蔣溪又西合涂水亂流西北入洞過澤也

西入于汾出晉水下口者也

劉琨之爲并州也劉淵引兵邀擊之合戰於洞過

卽是水也

晉水出晉陽縣西懸壅山

縣故唐國也春秋左傳稱唐叔未生其母邑姜夢帝謂已曰余名而子曰虞將與之唐屬之叅及生名之曰虞呂氏春秋曰叔虞與成王居王援桐葉爲珪以授之曰吾以此封汝虞以告周公周公請曰天子封虞乎王曰余戲耳公曰天子無戲言時唐滅乃封之於唐縣有晉水後改名爲晉故子夏叙詩稱此晉也而謂之唐儉而用禮有堯之遺風也晉書地道記及十三州志並言晉水出龍山一水結紉山在縣西北非也山海經曰懸壅之山晉水出焉今在縣之西南昔智伯之遏晉以水灌晉

陽其川上源後人踵其遺蹟畜以爲沼沼西際山
枕水有唐叔虞祠水側有涼堂結飛梁於水上左
右雜樹交陰希見曦景至有淫朋密友羈遊宦子
莫不尋梁契集用相娛慰於晉川之中最爲勝處
又東過其縣南又東入于汾水

湖水分爲二流北瀆即智氏故渠也昔在戰國襄
子保晉陽智氏防山以水之城不沒者三版與韓
魏望歎於此故智氏用亡其瀆乘高東北注入晉
陽城以周圍旣漢末赤眉之難郡掾劉茂負太守
孫福之於城門西下空穴中其夜奔孟卽是處也
東南出城流注于汾水也其南瀆於石塘之下伏
流逕舊溪東南出逕晉陽城南城在晉水之陽曰

晉陽矣經書晉荀吳帥師敗狄於大鹵杜預曰大
鹵晉陽縣也爲晉之舊都春秋定公十三年趙鞅
以晉陽叛後乃爲趙矣其水又東南流入于汾

湛水出河內軹縣西北山

湛水出枳縣南源湛溪俗謂之湛水也是蓋聲盡
鄰故字讀俱變同于三豕之誤耳其水自溪之南
流

東過其縣北又東過波縣之北

湛水南逕向城東而南注

又東過辟邑南

源經所注斯乃汨川之所由非湛水之間關也是
經之誤證耳湛水自向城東南逕湛城東時人謂

之湛城亦或謂之隰城矣溪曰隰澗隰城在東言此非矣後漢郡國志曰河陽縣有湛城是也又東南當平陰縣之東北南入于河湛水又東南逕鄧南流注于河故河濟有鄧津之名矣

水經卷第六

水經卷第七

濟水一

漢桑欽撰

後魏酈道元注

濟水出河東垣縣東王屋山爲沅水

山海經曰聯水出焉西北流注于秦澤郭景純云聯沅聲相近即沅水也潛行地下至共山南復出于東丘今原城東北有東丘城孔安國曰泉源爲沅流去爲濟春秋說題辭曰濟齊也齊度也貞也風俗通曰濟出常山房子縣贊皇山廟在東郡臨邑縣濟齊其度量也余案二濟同名也所出不同鄉源亦別斯乃應氏之非矣今濟水重源出溫西北平地水有二源東源出原城城東北昔晉文公

之湛城亦或謂之隰城矣溪曰隰澗隰城在東言此非矣後漢郡國志曰河陽縣有湛城是也又東南當平陰縣之東北南入于河湛水又東南逕鄧南流注于河故河濟有鄧津之名矣

水經卷第六

水經卷第七

濟水一

漢桑欽撰

後魏酈道元注

濟水出河東垣縣東王屋山爲沅水

山海經曰聯水出焉西北流注于秦澤郭景純云聯沅聲相近即沅水也潛行地下至共山南復出于東丘今原城東北有東丘城孔安國曰泉源爲沅流去爲濟春秋說題辭曰濟齊也齊度也貞也風俗通曰濟出常山房子縣贊皇山廟在東郡臨邑縣濟齊其度量也余案二濟同名也所出不同鄉源亦別斯乃應氏之非矣今濟水重源出溫西北平地水有二源東源出原城城東北昔晉文公

伐原以信而原降即此城也俗以濟水重源所發因復謂之濟源城其水南逕其城東故縣之原鄉杜預曰沆水縣西北有原城者也是南流與西源合而源出原城西東流水注之水出西南東北流注于濟濟水又東逕原城南東合北水亂流東南注分爲二水一水東南流俗謂之爲衍水即流水也衍沆聲相近傳呼失實也濟水又東南逕郟城北而出於温矣其一水枝津南流注于溴水出原城西北原山勳掌谷俗謂之爲白澗水南逕原城西春秋會于溴梁謂是水之墳梁也爾雅曰梁莫大於溴梁梁水堤也溴水又東南逕陽城東與南源合水出陽城南溪陽亦樊也一曰陽矣國語曰

王以陽樊賜晉陽人不服文公圍之倉葛曰陽夏商之嗣典樊仲之宮守焉君而殘之無乃不可乎公乃出陽人春秋樊氏叛惡王使虢公伐樊執仲皮歸于京師即此城也其水東北流與漫流水合水出關南東北流又北注于漫謂之漫流口溴水又東合北水亂流東南左會濟水枝渠溴水又鍾繇塢北世謂之鍾公壘又東南塗溝水注之水出軹縣西南山下北流東轉入軹縣故城中屈而北流出軹郭漢武帝元年封薄昭爲侯國也又東北流注于溴溴水又東北逕波縣故城北漢高帝封公上不害爲侯國溴水又東南流天漿水澗水注之水出軹南畢向城北在畢上俗謂之

韓王城非也京相璠曰或云今河內軹西有地名向今無杜元凱春秋釋地亦言是矣蓋相襲之向故不得以地名而無城也闕駟十三州志曰軹縣南山西曲有故向城即周向國也傳曰向姜不安于莒而歸者矣汲郡竹書紀年曰鄭侯使韓辰歸晉陽向二月城陽向更名陽爲河雍向爲高平即是城也其水有二原俱導各出一溪東北流合爲一川名曰天漿溪又東北逕一故城俗謂之治城亦曰治水又東流注于溴溴水又東南流右會同水水出南源下東北流逕白騎塢南塢在原上爲二溪之會北帶深隍二面岨嶮唯西被築而已東北流逕安國城西又東北注溴水溴水東南逕安

國城東又南逕無辟邑西世謂之無北城亦曰馬髀城皆非也朝廷以居廢太子謂之河陽庶人也溴水又南注於河也

又東至溫縣西北爲濟水又東過其縣北

濟水於溫城西北與故瀆分南逕溫縣故城西周畿內國司寇蘇忿生之邑也春秋僖公十年秋滅溫溫子奔衛周襄王以賜晉文公濟水南歷虢公臺西皇覽曰溫城南有虢公臺基趾尚存濟水南流注于河郭緣生述征記曰濟河內溫縣注于河蓋沿歷之實證非爲謬說也濟水故瀆於溫城西北東南出逕溫城北又東逕虢公冢北皇覽曰虢公冢堆溫縣郭東濟水南大冢是也濟水當王莽